

Inín po'po' pox ye'takuiga' iyixtaj  
mõnsajtõtõmej, iga kawí' ipan itzontekon  
nochi yej tamachtianitõtõ' tanextilij.

Iwán tamachtianitõtõ' kijtoj:


—Nikita iga se momachtía, ayá'  
moneki mamõnsajti' itzojmiyo, wel nõ  
momachtía yej ayá' mõnsajti' itzojmiyo.


## Po'po' yej mo-ichtakamachtij

Íkyaki' monechkojkej tõõtõmej iga yawij  
momachtitij iga wel matakuiķakan. E'  
tatekimakakej iga mamonechkoķan yejsan  
mojmõnsajti' itzojmiyo, yej ayá' mõnsajti'  
itzojmiyo inõn awel ompa monechkowa iga  
mamomachtí.

Iwán se po'po' poxsan kinekiá iga nõ  
mamomachtí, e' ayá' kikuikej iga ayá'  
mõnsajti' itzojmiyo. Inõn iga awel ompa  
mosenechkowaj iwán yej mojmõnsajtíkej  
itzojmiyõmej. Iwán iķkín kichij po'po' iga  
wel mamomachtí; nochipa kuá'  
mõnsajtõtõmej momachtíayaj, po'po' yaya  
nõ, e' wéķkasan miyanaya kan wel  
makikaki itájtõl tamachtianitõtõ'.

Iķkõn kichíwaya inín po'po' iga  
momachtíaya nõ kén iga wel matakuiķa.





Kua' tami' tamachtij tamachtianitoto',  
kijlij mōnsajtōtōmej:

—An sí nikneki manikaki yej  
nimitzmachtijkej.

Mōnsajtōtōmej san motatachiliayaj, iga  
akāwi' pan itzontekomej yej kimachtijtoyaj  
iga poxsan kuātakuaktikej. Ígasan iga  
mojmōnsajti' itzojmiyomej.

Iwán íkuā' chikotachá tamachtianitoto'  
iwán kita' kan ichtakatachixto' po'po'.

Iwán tamachtianitoto' kinotza' po'po'  
iwán kijlij:

—¿Te iga ompa tichtakatachixto'?

Po'po' kijtoj:

—Iga nej ayá' mōnsajti' notzojmiyo  
inón iga awel nasi kan titamachtijto'. E'  
malej iga wéjkanan nitakaktoya, achi kawi'  
ipan notzontekon yej tikmachtij  
mōnsajtōtōmej. Siga tej tikneki, wel  
manikuika yej nimomachtij ichtákanan.

—Kena wel. —kijtoj tamachtianitoto'.

Wan po'po' pewa' iga takuiga' iyixtaj  
mōnsajtōtōmej iwán tamachtiani.

